

七十二家集

庾開府集卷之十三

周新野庾信子山著

明閩漳張爕紹和纂

神道碑

周柱國大將軍大都督同州刺史段永神
道碑

公諱永字永賓東燕遼東郡石城縣零泉里人
也本姓段昔者昌意陵居初分若水之姓共叔
出奔始有京城之族西河居士蕃魏而邠秦北

岳將軍威胡而奉晉其後居於北代則先封遼
水備平史籍可略而言祖援鎮西將軍馮翊太
守父儒平東將軍持節恒燕朔三州諸軍事恒
州刺史公年裁弱冠卽值亂離驅馳關塞之間
早有縱橫之志軍陣方圓無勞聚米山川形勢
不待披圖魏正光五年入仕解褐殿中將軍孝
昌三年加龍驤將軍永平二年授平東將軍都
督中塹建義勲謀是先蒙賞倉泉縣開國男食
邑一百戶其年淮淝侵軼南鄙徵兵公受脰偏

師一月三捷昔張遼奄至

有關文

沃陽縣開國伯食邑五百戶進爵爲侯永熙元年授使持節車騎大將軍左光祿魏武帝特召入任閣內大都督馬武小心侍蕭王於卧內典常忠壯陪魏后於宮中于昔賊帥元伯破掠城市西自潼函東綿鞏洛京畿大都督請士馬五千公曰此賊無他策尋爲鳥散止請五百騎應手生擒朝廷賞其謀策百姓喜其除害旣而喪亂弘多生民版蕩乘輿西幸宗社北遷公妙識

玄象深知歷數乃與昆弟謀爲自全斬西中耶
將送首關內蒙賞昌平縣開國子食邑三百戶
大統元年授使持節都督北徐州刺史平竇軍
復弘農戰沙苑河橋公並預先登身當鋒首謨
猷應變備在司勳增邑八百戶通前合二千戶
進爵爲沃陽縣開國公授南汾州諸軍事南汾
州刺史十四年增邑三百戶轉大都督其年授
車騎大將軍儀同三司加散騎常侍十六年授
驃騎大將軍開府加侍中尋受恒州諸軍事恒

州刺史又遷雲州刺史昔軒丘分族異姓者十
四人鄠邑建侯宗盟者四十國太祖文帝席卷
關河三分天下潁川從我並有鄉里之親新豐
故人非無布衣之舊更立九十九姓還存十六
國舊胃還姓爾綿增邑一千進爵爲廣城郡開
國公尋授文州諸軍事文州刺史國家以玉門
西拒久勞亭鄠陽關北牧多事風塵武城二年
有詔進公都督瓜州諸軍事瓜州刺史是以名
馳梓嶺聲振榆關無雷畏威負霜懷惠保定三

年還朝授工部中大夫尋遷軍司馬夏官司武
待白露而治兵冬官考工紀玄雲而授職四年
增邑三百戶通前合三千九百戶其年授使持
節大將軍都督治左八軍總管軍事朝登上將
幕會小卒事涉交接觀豐而迈天和四年以本
官領小司寇三度有星名天獄八封有坎象刑
書公繁不秋荼嚴無夏日民知約法未肯以獄
吏爲尊吏識刑名無敢以死灰相懼又任左廂
第三軍總管仍被勅將兵馬北道教習韓信大

關卽申軍令陳農愛詔仍校兵警豈直六郡良
家五營騎士懸知正正之旗遙識亭亭之氣蒙
犯霜霽旗鼓驅馳俄而遭疾疹至大漸五年六
月十六日薨於賀葛城春秋六十有八將軍死
綏三軍行哭都護喪還緣邊追祭九月二十三
日靈柩至于京師皇帝臨喪百寮赴弔詔遣使
持節車騎大將軍儀同三司賀拔軌監護喪事
又遣使持節車騎大將軍儀同三司紇豆陵亮
冊贈使持節柱國大將軍同華宜敷冊五州諸

軍事同州刺史謚曰某公其年十一月五日塋
于京城南高陽原高司里夫人赫連氏兖州刺
史悅之女年十四適爾綿氏冊拜魯城縣君遷
濟陰郡君又遷廣城國夫人肅恭令淑儀範賢
才四德有耀三星增輝三公夫人見於斯矣建
德元年十二月亡春秋五十有八二年正月歸
於高司之塋劉荊州之墓合塋於襄水之陽衛
將軍之陵同穴於廬山之下嗚呼哀哉世子岌
使持節儀同大將軍領兵部大大純孝事親忠

貞事國禮義自立聲名有焉銘曰

軒臺受氏若水降居西城仲胤北陸寔餘山川
雄烈風俗扶踈昔我關塞汭襲干戈時遭拔本
世值橫波北封代郡東據遼河地未平一天猶
薦瘡我公重光繼文踵武總牧三蕃兼治六輔
雅俗觀風都亭待雨不逢問吏無聞桴鼓公以
載世挺此令聞孝有三德忠惟一君馬陵釋患
聊城解紛兵防滿月戰避迎雲長松都尉細柳
將軍旣牧淮海且藩恒代高壁負關長亭穿塞

豐鼓司盟

吏不能欺兵無敢背玉關

遺矩汾海留愛大將受冊公昇其壇六卿咸事
公貳其官夷陵燒楚上黨分韓營軍叅合校戰
皐蘭年深厲起福過災生上台裂岳次將星傾
赤地悲淚白虎哀鳴懸弓靈幕繫馬塞垆煙凝
不動泉凍無聲天子愴然追於贈謚禮官賜冊
陪陵受地印綬曰策衣衾曰襚玄窆就列黃腸
在位自此何世從斯幾春樹爲櫪社陵成谷神
詎知雲閣名在功臣

周柱國楚國公岐州刺史慕容寧神道碑
昔在殷書懋賞周禮議勲諸侯計功大夫稱伐
惟師尚父昆吾載寶鼎之銘王命尸臣徇邑傳
綢戈之賜故知太上立德明試以功存有顯爵
之榮歟有大名之貴昊天不弔其惟楚國公乎
可以旌德景鍾勲勳藝器式昭盛美載揚洪烈
者焉公諱寧字永安昌黎徒何人也都尉總六
縣之卿名山稱五岳之佐燕太祖文皇帝慕容
皝以當世英雄奄有河朔趙之南境且建王城

冀之北土仍爲興國公旣號之苗裔家世燕陲
高祖侍中使持節都督中外諸軍事太保錄尚
書北地王慕容超之世蕃屏王室詳之燕錄可
得稱焉曾祖尚書府君因魏室之難改姓豆盧
仍爲官族祖仕魏文成皇帝考早亡朝廷以庸
勲攸屬恩深追遠保定三年有詔贈柱國將軍
少師涪陵郡開國公食邑二千戶公稟氣中和
降祥川岳岐嶷表羈貫之年通禮稱綺紈之歲
夙著奇節幼表大成兄弟分果備知推讓賓客

解鈴曾無恹色永安元年太宰朱天光魏室元
輔握兵淮右抗擯江南公肯任別將便從征伐
自是長城峽石必先行陣秦南隴西每當矢石
摧堅乘勝莫不前驅策勲行賞常居第一永熙
元年補子都督并加鼓節軍儀除桑乾太守轉
都督其年以魏皇西幸奉迎大駕賜封河陽
縣開國伯增邑三百戶俄遷大中大夫改伯爲
侯增邑合九百戶仍授使持節都督顯州諸軍
事顯州刺史四年遷鎮東將軍金紫光祿大夫

其年秋河橋之役先登破陣遷爲車騎大將軍
儀同三司五年沙苑之功加封合前二千戶俄
授敷州刺史加散騎常侍外深推轂內侍集書
十五年授右衛將軍十六年授大將軍後魏元
年重授敷州刺史公以先經刺舉固辭不就三
年改封武陽郡開國公除尚書僕射職惟贊奏
任居封掌分左右之儔兼典舉之選屬以江南
阻兵渚宮邊敵軍機警急鋒鏑縱橫公奉命星
言元戎啓路惣秦人之銳士兼荆戶之廣卒水

龍競雙刀之勢步奇陳四分之威夷陵旣燒黠
中方定旋軍反旆解甲休兵其後鳳州內判成
都外絕公又總督衆軍蒐乘卽道兵不血刃並
皆擒獲遷其酋豪納其降附皇朝受終文祖革
命神宗選賢與能改絃創制爰降冊書授公柱
國增邑四千戶二年授同州刺史衿帶關輔唇
齒秦晉編戶殷積邸閣儲峙藩籬是任親賢勿
居公建旟作牧褰帷行部六條斯舉百城咸勸
三年授公大司寇又以功勲庸特著冊封楚國

公食邑一萬戶蓋因破侯方仁等於荆陝卽其地而封焉逖糾王慝弛張刑政式遏寇讐於是御之以寬猛柔遠能邇然後平之以冲和舜任咎陶不仁者遠晉舉隨會羣盜皆奔保定四年授岐州諸軍事岐州刺史沉涸彌留保定五年三月四日薨於私第春秋六十有二詔贈太保同鄜等十州諸軍事同州刺史謚昭公禮也十月庚申塋於洪瀆之川馳繚毀宗客車專道玄甲被屬國之兵介士陳輕車之騎克善令終生

榮苑感鳴呼哀哉公經德秉哲體道居貞履貴
思冲居盈念損澄波千頃不能變其清濁高牆
百仞無以測其汗隆立身行已居安如墜亡躬
殉義視嶮若夷至於將畧應變出奇設伏太一
風角之占常從星辰之候樓船戰陣之祿強弩
馳射之書莫不動會機神發符雷電梯衝所向
地靡百樓之城長戰所臨野關三門之陣是以
斬將奪旗四十三戰尊官厚祿三十七年武彰
七德之義誦誦九公之業迹紀庸器之文行昭

易名之典昔臧文既歿穆叔稱其立言鄭僑云
亡宣尼泣其遺愛德陽青石之墓千年未平板
江白虎之碑百代無毀敢因斯義乃作銘曰
遼水之東冀州之北旣曰都尉兼稱屬國歛氣
餘勇雄邊遺則孝實天經忠爲令德冠冕世祿
羽儀祚胤俗被燕丹風慚英蘭勛勞役行辛苦
行陣勇過溺駿氣踰瓦震王國克生思皇多士
溫溫恭人謙謙君子擁旄仗節出蕃入仕
五朝建旟千里時逢改特名載策勲淮陰召拜

昭陽破軍職司刑政獄慎深文沈羊不飲萑盜
無聞巴庸薄伐江漢專征軍總六校兵兼七營
運長擊短後實先聲增壘威敵滅龜潛兵鍾鳴
夜漏晞露朝陽邑里蕭索宅帷荒涼豐碑下極
題奏遷喪宮臨樗里臺傾孟嘗卜兆戒期遠辰
告筮德遺身後名昭歿世館舍長捐泉扃永閉
晏嬰悼齊柳莊悲衛風秋北原日沒川逝塋田
舊頃客土新封淚墮片石劒拄孤松清徽令範
千載餘蹤

傳

周使持節大將軍廣化郡開國公丘乃敦
崇傳

崇恒州代郡鼓城縣廣義鄉孝讓里人也昔壽
丘建國賜姓者十二人平陽舉賢登朝者十六
族况復大電繞樞流星入昴派分源別幹其嗣
興者乎魏道武皇帝以命世雄圖飲馬河洛兄
弟十人分爲十姓辨風吹律丘氏卽其一焉五
代祖遼驃騎大將軍開府儀同三司營丘郡開

國公于胥天道西北旣稟謀謨馬首東南實資
匡贊因以封名仍爲賜氏與夫南公伯卽有連
類宗則樂正非無準則曾祖雙軌使持節驃騎
大將軍司徒青兗二州刺史范陽文昭公洛食
之始上馬治國登庸之初昇槐論道生則絕席
武宮死則配祠清室夫人太原王氏三世爲將
四代爲公社稷大宗鐘鼎貴族伉儷是歸秦晉
是也祖提使持節衛將軍駙馬都督河交二州
刺史靈壽縣開國公公子公孫聲名籍甚增輝

增耀弱冠昇朝夫人清廉郡長公主孝文帝之
第二女也王姬有行車服不繁故得衛青上將
張耳賢夫父願使持節大都督徐州諸軍事徐
州刺史平陽縣開國公食邑四千戶少年習象
多見兵書澆沙聚石之營却日橫雲之陣鸞弧
則戟破小吏抽劍則泉飛枯井夫人宇文氏周
文皇帝之第三妹也母儀令範女師賢哲德高
隆慮義重河陽魏受其終周新其命式墓封墳
旌盛德乃贈使持節大將軍廣化郡開國公

食邑一千戶夫人贈安德郡長公主遼魂寃結
非無廣漢之城久客思歸唯有東平之樹自永
安以來魏室大壞海水羣飛天星亂動禮樂征
伐不出於人主舉賢誅暴議在於強臣高丞相
驅率風雲奄荒齊晉我舅氏文皇帝駕馭龍虎
據有周秦南北渝盟東西敵怨旣而各受圖書
並當珪璧百姓則父南子北兄東弟西事主則
憂親求生則慮禍大周親戚徧鍾茶炭輸之城
旦下之織室關河嚴隔三十餘年天厭喪亂人

思反德彼之風塵旣靜函谷此之冠蓋屢涉漳
濱中山冤枉之餘代郡凋殘之澤並遇革音咸
蒙禮送崇賓兄弟二人相看氣息親愛凋零方
寸久亂恒山殺翮豈望同飛而安國徒中鬱爲
卿相班超絕域遂得生還天和四年至於新邑
朝廷以舅甥之國外內之親乃授賓使持節驃
騎大將軍開府儀同三司大都督安樂縣開國
公食邑一千戶賓得免虎口仍上龍門聲價已
高風焱卽遠方欲討論國耻申雪家冤橫尸原

野是所甘心肯不我與先從朝露春秋若干衛
國興文子之慟長安有詔塋之悲乃贈本官加
少傅蒲虔勳三州諸軍事蒲州刺史以天和六
年某月日塋於長安之洪瀆原妻青州石氏長
城郡君胤子孤齡生妻嫠室卽能有節還成守
義崇蒙授使持節大都督驃騎大將軍開府儀
同三司廣化縣開國公食邑一千戶昆季二人
同年上將彰廷交映榮戟相臨昔二馮同德繼
踵當官兩杜齊名夾河爲郡比斯榮寵彼將慙

色俄然賓疾奄捐館舍崇兄弟勝衣備罹禍酷
同氣長養得及全人今者來歸更連凶閔每一
悲慟行路傷心撫養愛子情深馬援之慈恭事
寡嫂義甚顏含之孝天和六年援大將軍餘如
故龍庭賞出塞之功玉門勞旋師之寵異代同
和見之今日建德二年授使持節都督宜州諸
軍事宜州刺史忽忽橫閣但有誦書驢驘重帷
帷聞善政清不置水明非舉燭乃是入境移風
非直停車待雨有勅大將軍宜州刺史廣化郡

公崇自夏季無雨以迄於今雖靡神不禱仍未
降感知彼州內獨蒙滂澤諒由大將軍精誠所
至憂念郡人豐稔可希良以爲慰又勅廣化公
學知此存心政術治勤黎人受委稱職嘉尚無
已吾人有言非行之難念加勉最以致盡善指
令宣納抑操賜齊陳物如別宜諭朕懷昔陽平
太守別降紅粟之恩荊州刺史偏蒙袞衣之賜
治績尤異此之謂乎崇清淨爲政廉明爲法人
不忍背吏不忍欺性不飲酒無所嗜欲深沉牆

仍喜愠不形文必正詞絃惟雅曲仁義禮節是
所用心緹袂細素愛翫無已當令四郊多壘尚
有公卿之辱鼓輦不息猶勞將帥之謀語其讐
耻唯願橫行死地思其報國不羞身膏原野但
令天假之年時緩之福忠貞之事公其取焉畧
書梗槩陳之直史

庾開府集卷之十四

周新野庾信子山著

明閩漳張爕紹和纂

墓誌銘

周大將軍開喜公柳霞墓誌銘

君諱霞字子昇河東解縣人也秦始征晉之地
漢開平越之鄉律中夷則星居鶉首况復莊謀
於衛旣爲社稷之臣喜對於齊無廢諸侯之職
祖叔珍宋員外散騎常侍義陽內史有徐邈之

應對居於散騎之省有汲黯之正直理於淮陽之郡父季遠臨川王諮議叅軍宜都太守蘭臺石室是所洽聞白馬飛狐逾高詞氣西都吳融擅名江表言談相會宛如舊焉君膺令德之靈稟冲和之氣齟齬髻髮夙智早成愛敬自天虔恭得性含仁抱義履信居貞世父儀同忠惠公特加罷異乃謂公曰吾昔逮事伯父太尉公見語云我昨夢汝登一高樓樓盡峻麗吾以坐席乞汝汝或富貴恨吾不及見耳吾向聊復晝寢

又夢將昔時坐席還復賜汝汝官位當復見及
王祥佩刀世爲卿族鮑永驄馬家傳司隸以此
連類差無慙德輕車西昌侯作藩襄漢君昔年
十二以民禮修謁進止端詳神情雅正侯目送
之不輟試遣左右踐君衣裾欲視舉動君徐步
稍前曾無顧眄魏侯之見劉廙不覺斂容漢主
之觀田鳳遂令題柱比之今日曾何足云驃騎
廬陵王帝子出藩懸衡高選以君華望召爲主
簿張坦直諫旣稱荀令之香鄒湛知言彌見羊

公之德詔議府君於都薨背君奔赴六日卽屈
京師形骸毀瘁不復可識靈柩泝江中川薄晚
亂流乘選迴風反帆舟中之人相視失色抱棺
號慟誓不求生俄爾之間風波卽靜咸以君精
誠所致成都孝子自赴江流貴陽先賢身彰野
火並存靈應咸可傷嗟太夫人乳間發瘡醫云
難得人吮癰血或望可差君方寸已亂應聲卽
吮旬日之間遂得痊復君於事親可謂至矣從
兄右衛擁旌嶺表苦相携致昔馬遊志氣爲馬

援所知班嗣才學爲班彪見賞復聞於今日矣
乃除永化縣令靜尋歎案或吟長岑之遠乍撫
鳴琴不以河陽爲陋日南金柱合浦珠泉曾莫
經懷未嘗留目解巾平西邵陵王法曹叅軍仍
轉外兵除尚書工部郎始入禮闈卽登蘭閣尚
書僕射陳郡謝舉人望國華引君言論謂同坐
曰江漢英靈見於此矣西中郎岳陽王以綠車
之重臨西河之牧拔用君爲本州治中尋遷別
駕王叔理以品物流名陳仲舉以題軒馳譽君

之展驥兼而有之及乎大盜移國王室騷然月
動星搖雲平虹直岳陽王承制硤左當壁漢南
天綱所頓英賢畢集授君吏部員外郎散騎常
侍兼太子侍讀監儲甲觀事重史丹侍講桂宮
名高張禹俄遷車騎大將軍大都督賜爵聞喜
縣公侍中開府儀同三司餘如故方之驂乘霍
去病爲侍中譬彼將兵公孫敖爲驃騎足以照
曜六府謨明九德豈直允諧上將臣贊中軍而
已哉旣而言從梁國服政酆都管仲有詞卽受

下卿之禮臧孫見德還奉嘉賓之宴有詔授使
持節驃騎大將軍開府儀同三司霍州諸軍事
霍州刺史犀節去關袞衣馳傳迎郊則文學前
驅賓衛則邦君負弩直以五溪遼遠馬伏波之
思歸二湘卑濕賈長沙之不願是以宜城刺史
直會鹿門白沙故地仍畱龍種天鴈弗戒奄然
終極太和某年歸寔於襄陽白沙之舊塋君罷
宇詳正風鑒弘敏澡身浴德游藝依仁汝南令
望扶風長者不言財利王夷甫之爲德不談人

罷織絮絮胤子視陰餘息霜露履之哀哉欒棘
龍巢北望鳳闕前觀松長風遠地厚泉寒書埋
簡落琴覆絃寬贈行之冊書而納棺

周大將軍襄城公鄭偉墓誌銘

公諱偉字子直滎陽開封人也周宣母弟就封
于鄭河洛之地卽有民人號鄆之君非無郡邑
其後蛇閼於門龜嘗於鼎韓侵負黍晉滅陽城
其祀忽諸以國爲氏祖徹撫軍贈濟州刺史父
先護驃騎大將軍儀同三司襄城郡公青州刺

文昌一星青衿辨志童子離經義助非馬書勤
映螢往年靈樞漂泊江沱以君哀慟川后停波
揚名北海馳譽西河誰登九折不入朝歌蔚炳
霄變攀陪遂遠白塵隨軒冊暈附冕位叅上將
榮兼本選蛇盤綬結龜廻印轉來朝平樂歸政
咸陽蕃維卽啟軍幕仍張起茲禮數峻此戎章
長離宛宛刷羽陵江世急奔流年催驚隼滅沒
顛纏扶桑握軫智士石折賢人星殞西鄂芝枯
南陽菊盡愴焉啟手生榮終極相杵輟春鳴機

物阮嗣宗之爲人從容亂離之機保此令德舒
卷風雲之際無妨貴仕張衡渾儀之後卽賦歸
田杜預沉碑已來遂停鄉里王仲宣有讀書之
樓諸葛亮有彈琴之宅實欲因此謝病閑居終
焉鳴琴在膝或對故人寶劒自隨昔遇稚子百
年俄頃嗚呼哀哉遂使君子之陵止埋銅劍賢
臣之墓唯銘石函銘曰

有莊有惠居魯居衛義是隨時才堪濟世北部
尚書東京司隸必復其始侯君相繼華蓋一岳

史永安中洛城晝掩黃河凌合翟泉會盟之地
蒼鳥忽飛武庫兵欄之中鱗魚遂上三帥北緦
五馬南浮梁武帝大造中原樹君伊洛公憑軾
棧車言歸舊壤起爲通直散騎侍郎天厭魏德
政在強臣公耻入亂階乃於陳留起義太祖封
陶谷而待諸侯坐鄴宮而朝羣后威懷是接席
卷西飛大統三年入朝蒙授武陽縣開國伯食
邑六百戶尋除龍驤將軍北徐州刺史開河橋
之陳解玉壁之圍張旛於富平被縛於伊闕探

虎穴而揮戈上魚門而懸胃故以策名司勲功
高舍爵魏將侯景狼顧荆河天子命我偏師赴
援垂餌虎口中途背盟事獲交綏公之力也除
中軍將軍散騎常侍大都督襲襄城郡公食邑
二千戶仍除使持節車騎大將軍儀同三司餘
如故遷驃騎大將軍開府加侍郎常伯位重霍
去病之登朝上將官尊公孫敖之出塞以今方
昔異代同榮魏後二年授大將軍江陵防主都
督十五州諸軍事具兵教士臚舳習流島嶼憑

陵波瀾衝激公蹙臨江界已悉南越之兵裁泛
樓船卽善昆彌之戰遂得安歌澧浦弭節潯陽
留魯侯而宴章臺對齊人而吹雲夢周保定元
年授使持節都督宜州諸軍事宜州刺史天和
六年授都督華州刺史餘如故嶠函重嶂汧渭
分流陽陵之溢旣奔華陰之學還聚而消渴連
年屢有相如之患至于大漸遂如范增之疾桐
君對藥分闕神明李柱侍醫更無方便以天和
六年四月十七日薨年五十七詔贈本官加少

傳都督司豫洛相冀五州諸軍事司州刺史謚
曰肅公禮也天子輟朝彌深大臣之議羣公會
葬咸得同盟之禮夫人李氏頓丘貴姓卿相之
門賢才之室霜露先侵策封郊次以其年十一
月六日合葬於咸陽之長安縣某原合葬非古
既異三王之前死則同穴還同六載之始雖復
銜珠兩鶴同歸紫蓋之松出匣雙龍共沒延平
之水嗚呼哀哉乃薦銘曰

國有巖邑朝多君子武公莊公平王卿士溫麥

徒盟初田廢祀驟乘停輿來朝識履惟祖惟考
旣侯旣公樞機周密出納清通治繁政簡處亂
心雄濟河遺惠海岱餘封世濟其美載誕其罷
忠無不爲孝則不匱幽冀紛梗關河鼎沸自北
自南聲聞梁魏揚旌汝穎威震三川擁旄江漢
席捲樓船成臯塵起廣武烽燃麋興鹿箭鴈落
驚弦總衛蘭錡申威河外山類鼓樓樹如車蓋
都護兩道將軍獨拜梧桐茂苑楊柳倡家千金
回雪百日流霞凋零倏忽悽愴榮華河陽古樹

金谷殘花隴昏雲暝山深路晚風氣纔高松聲
卽遠疇昔親友懽愉交結不爲平生應爲此別

周大將軍琅瑯定公司馬裔墓誌銘

公諱裔字遵胤河內溫人也南正司天北正司
地是謂羲和之官卽嗣重黎之政邛之歸楚與
章邯而並封豫之避秦共毛公而俱去祖金龍
仍居選部水鏡三臺父悅再牧荆河威風千里
而身遭禍機遂爲季布所哭獲存遺嗣實賴程
嬰之忠國家追念功臣更撫叔敖之子言思官

族還求女齊之亂公始應辟爲河內功曹除員
外郎常侍汲郡治兵黃河浮馬推鋒軼關之捷
逐北長城之陳授平東將軍北徐州刺史柳泉
風塵三城席卷棠陰鋒鏑千室入關遷車騎大
將軍儀同三司開國龍門縣伯仍除巴州刺史
雖復巴水三迴夷歌數曲徒逢白竹之弩已濟
青衣之功朝廷以漢之功臣須開上將之府晉
之代胄宜紹瑯琊之國遷驃騎大將軍開府改
封瑯琊公食邑一千五百戶宮闈近密寔俟忠

貞詔爲大御伯仍除大御正職司常伯任總夔
龍王道旣平絲言惟允尋除始州刺史都督始
州諸軍事蠻夷恃險狼顧鴟張高山尋雲深谷
無景九地縱橫三門起伏峰危馬束水險橋飛
遂得谷靜山空冰消霧散仍爲信州刺史都督
信州諸軍事精兵守於白帝足懼巴州之城船
梯下於荊州彌動西陵之戍卽授使持節大將
軍都督西寧州諸軍事西寧州刺史將啓北戶
之人向通雲南之國聞寵若驚奄從深夜天和

六年正月十八日亡春秋六十五詔贈本官加
懷邵汾晉四州刺史謚定公禮也以建德元年
七月十三日塋於武功郡之三疇原公愛敬純
深有隱無犯忠貞亮直知無不爲在戎四十二
年身經六十九戰至於多龜唱籌並得成功飛
沙擁石未嘗乖律恂恂教義吳起西河之風閑
閑鼓旗李牧長平之政身死之日家無餘財山
水所資一由詔塋有始有卒生榮死哀銘曰
祝融是命重黎克舉公族乃建天官卽序避世

於秦承家於楚金行失馭玉鏡淪輝我之烈祖
識變乘機黃旗東沒青蓋西飛落星置道長州
出圍及我皇父荆河再撫世屬喪亂身沒猾虜
嗟我遺嗣崎嶇趙武寒覆鳥翼饑吞獸乳獲歸
河內更襲瑯琊年方小馬怨結長蛇藏兵九地
置劒千家雪山埋馬冰河陷車旣乃班政超然
榮守朱鷺頻飛金龜轉紐築塞長榆營車高柳
玉案推食河橋勸酒石門冰釋金堤電散蘆水
門闢茅津茂觀馭風逸翮修途始半建武功臣

先悲吳漢沉寥搖落游塲浸微金城路斷郿塲
人稀風松雲蓋白水山衣賢已星殞人沒蘭衰

周大將軍上開府廣饒公鄭常墓誌銘

公諱常字子元滎陽人也周宣王之弟初封其
國鄭穆公之孫始成其姓祖思慶建威將軍山
陽太守考頊儀同三司豫州刺史南陽坐嘯值
此邦君西河建隼逢斯刺舉公侯繼踵冠冕連
鑣可得而言傳於史籍公髫鬣知禮早年馳譽
就經幄舍畧見書堂習武兵欄偏知劔術雖復

年猶小學已爲儒者所稱位在偏裨卽入將軍之賞大統三年起義華陽授永安縣開國男文皇帝霸迹初基英雄輻輳公拔劒轅門潁川從我洛城逆戰壯於白馬之兵河橋解圍勇於烏林之策授平東將軍帥都督襲父封魏後三年授持節車騎大將軍儀同三司車騎用郭淮之勲儀同取王沉之貴公之此授僉曰得人進爵廣饒縣公邑千戶保定三年授使持節都督遷州諸軍事遷州

神道碑作羅州刺史今墓誌作遷州按隋地理志西魏嘗於竹

出縣置羅州宇文後周於房
陵郡置遷州至隋并號房州
刺史卽總領金州
兵馬開拓北戎高山尋雲深谷無景梯繩乃上
浮竹裁通閩越影響勾吳聲勢公出戰短兵並
皆奔北瓦解冰碎山空谷靜授持節開府儀同
大將軍柏梁高宴有大將軍之詩幕府初開有
平陵侯之國比之今日豈可同年而語哉自是
使車破之繡服風謠是察刑政是觀公露節東
驅風奔羣盜埋輪當路威振中原武皇帝有盟
津之師以公爲中權之勁外從決勝內侍軍謀

及文軌旣同旃旌已偃司勲行賞軍吏舉功乃授使持節上開府增邑五百戶賜姓宇文與國同乘之榮周之宗盟非復異姓之後蕃屏是寄隆寵所歸公室無踈此之謂矣九州都督須得其才千里諸侯實俟其政乃爲使持節都督東徐州諸軍事徐州刺史尋遷南兖州諸軍事南兖州刺史公頻總六條再勞十部俗變風移人懷吏畏滯穗遺秉有利疲人山桑野蠶足克貢賦化被殊俗威行隣境奏事京師四方第一謂

真刺史其在斯乎春秋未高奄然遭疾以大象
元年薨于州鎮時年六十三嗚呼哀哉吏人扳
慕飛走變色河濟輟春淮沂罷市以今年歸塋
於滎陽之山詔贈某官禮也嗟陵谷之貿遷懼
徽猷之永遠地久天長敢鐫貞石銘曰

荊河惟豫洛食之本水進滎渡山斜陸渾德星
猶照祥風永遠代不乏賢又無闕克公之生也
實降英靈忠爲德本孝稟天經觀書虎館學劒
龍亭雕弓偃月行馬流星置陣黎陽麾兵官渡

平陰聽鳥馬陵書樹氣視廻津星占飛步火斷
羗營沙崩賊路及驅犀節乃牧雄州吏不驚犬
人無喘牛西蠶得歲東作逢秋草爛獄戶星低
市樓五將星亡三台岳折哀哉天道遂當明哲
棟梁崩壞風雲寂滅北郭長悲東都永別幽深
此地宅兆斯憑山廻虎圈路上魚陵悲風夜烈
苔露晨凝蘭芬菊茂終古相成

周大將軍義興公蕭太墓誌銘

昔司徒之敷五教當堯讓之初丞相之總萬機

值秦亡之後若殷人受氏乃承微子之封梁運
應圖實啓延陵之國公諱太字世怡蘭陵人也
太祖文皇帝之孫鄱陽忠烈王之子派別天潢
奕分若水直幹自高澄源已遠茂親明德是稱
毛畢之功宗子維城乃建邢茅之國大同元年
年十六封豐城縣開國侯食邑五百戶山臨鶴
塞非無陶侃之賓氣連牛斗卽有張華之劍解
褐給事中仍太子洗馬公子出身非郎官而同
品中朝洗馬異式道而前驅以公居之誠爲高

遣大同元年入直殿省其年轉太子中書舍人
南宮宿衛職司蘭鐙北閣從班榮叅顧問通籍
兩宮得賢斯在大同三年授持節仁威將軍譙
州刺史褰帷祥氣之境刺舉消憂之地南陽風
俗文學更多美稷相迎童兒逾遠旣而亂離瘼
矣王室騷然大夫有行役之悲君子有無期之
怨背關懷楚扁舟而行江漢奉當壁之君華夏
歸中興之主承聖元年拜侍中無雙對問實踵
武於丁鴻多識舊章足齊衡於王粲二年除持

節平西將軍臨川內史仍轉平南將軍桂陽內
史尚方鑄劍再轉金龜御史分符雙封銅虎豈
直鄧攸清白見稱五鼓之歌劉寵廉能名爲一
錢之郡遂以天保未定王途多梗還吳不可歸
蜀無路臨淄負海翻然改途竄身清漳垂翅渤
海蒙授車騎大將軍散騎常侍仍爲持節都督
永州刺史而秦亭壓境邾柝聞城鼓角地鳴將
軍天落雖復瓶缶聽聲無防於地道冠繩柴結
不却於雲梯請命受降翻歸都護周朝以楚材

晉用不停於平章趙璧秦求無論於羈遠以保定五年除使持節驃騎大將軍開府儀同三司義興郡開國公食邑一千三百戶天和二年授使持節都督蔡州諸軍事蔡州刺史楚項襄之愛子旣布衣而戍谷魏安釐之母弟亦羈旅於邯鄲憂旣傷人降年不永春秋五十有一薨於蔡州之鎮送故入關空餘衮服歸軒在道還更垂帷嗚呼哀哉有詔贈官謚某禮也五年十一月塋於長安北原樗里子之墳正臨武庫太史

公之墓直對華門銘曰

玄鳥遠烈相士弘謨東封宋社西歛秦圖人承
佐漢國紹開吳有美令德茂親藩邸建國皇支
承家帝弟率由冥會亮直天啓轅固聞詩唐都
習禮博望之苑金華之宮文林講德武帳叅戎
名書柱上策滿帷中託身溜石蒞政淮東秦降
西逼楚澤南窮崑驚獵火或懼秋風屬期遠畧
逢茲應變陣橫十里兵圍一面月暈孤城塵驚
虛援春筍非糧秋蒿無箭垂翅卧龍夷矜輟戰

昔值懷來恩加始賞王爵愈峻戎章更上朱鷺
才飛虞歌卽響泣子畱恨藏書長往炎涼迭運
零落山丘霜芬幕月松氣陵秋嗟南國之王子
成東陵之故侯

庾開府集卷之十五

周新野庾信子山著

明閩漳張爕紹和纂

墓誌銘

周大將軍懷德公吳明徹墓誌銘

公諱明徹字通昭交州秦郡人也西都列國長
沙上功被山河東京貴臣大司空名高霄漢豈
直晉河有守智足抗秦建平有城威能動晉而
已也祖尚南譙太守父樹右軍將軍抗拒淮沂

平夷濟潔代爲名將見於斯矣公志氣縱橫風
情倜儻圯橋取履早見兵書竹林逢叅偏知劔
術故得勇爵登朝材官入選起家東宮直後除
左軍葛瞻始嗣兵戈仍遭蜀滅陸機纔論功業
卽值吳亡公之在梁未爲達也自梁受終齊卿
得政禮樂征伐咸歸舜後是以威加四海德教
諸侯蕭索煙雲光華日月公以明略佐昔雄圖
贊務鱗翼更張風飈遂遠冠軍侯之用兵未必
師古武安君之養士能得人心擬於其倫公之

謂矣爲左衛將軍尋遷鎮軍丹陽尹北軍中候
總政六師河南京尹冠冕百郡文武是寄公無
愧焉瀟湘之役憑陵島嶼風船火艦周瑜有赤
壁之兵蓋舳櫓魏齊有橫江之戰仍爲平南
將軍開府儀同三司都督湘衡桂武四州刺史
遂得左廣廻局轡車反暢長沙楚鐵更入兵欄
洞浦藏犀還輸甲庫雖復戎歌屢凱軍幕猶張
淮南望廷尉之囚合肥稱將軍之寇莫不失穴
驚巢沉水陷火爲使持節侍中司空車騎大將

軍都督南北交青譙五州諸軍事南交州刺史
南平郡開國公食邑八千戶鼓吹一部中台在
玄武之宮上將列文昌之宿高蟬臨鬢吟鷺陪
軒平陽之邑萬家臨菑之馬千駟坐則玉案推
食行則中分麾下生平若此功業是焉旣而金
精氣壯師出有名石鼓聲高兵交可遠故得艦
舳所臨蓋於淮泗旌旗所襲奄有龜蒙魏將已
奔猶書馬陵之樹齊師其遁空望平陰之鳥俄
而南伸出車方叔蒞止暢轂文茵鈎膺條華遂

以天道在北南風不競昔者裨將失律衛將軍
於是待罪中軍爭濟荀桓子於焉受戮心之憂
矣胡以事君宣政元年屈於東都之亭有詔釋
其轡鑣燭其疊社始弘就館之禮卽受登壇之
策拜持節大將軍懷德郡開國公邑二千戶歸
平津之館昔聞櫪馬之嘶含廣城之傳裁見諸
侯之客廉頗眷戀寧聞更用之期李廣盤桓無
復前驅之望霸陵醉尉侵辱可知東陵故侯生
平已矣大象二年七月二十八日氣疾增暴奄

然賓館春秋七十七卽以其年八月十九日寄
瘞於京兆萬年縣之東郊詔贈某官謚某禮也
江東八千子弟從項籍而不歸海島五百軍人
爲田橫而俱死焉嗚呼哀哉毛修之埋於塞表
流落不存陸平原敗於河橋先生慙恨反公孫
之柩方且未期歸連尹之尸竟知何日遊魂羈
旅足傷溫序之心玄夜思歸終有蘇韶之夢遂
使廣平之里永滯寃魂汝南之亭長聞夜哭嗚
呼哀哉乃爲銘曰

九河它土三江貢職彼美中邦君之封殖負才
矜智乘危恃力浮磬戢鱗孤桐垂翼五兵早竭
一鼓前衰移營滅竈空幕禽飛羊皮詎贖畫馬
何追荀瑩永去隨會無歸存沒俄頃光陰愴悽
岳裂中台星空上將眷言妻子悠然亭障魂或
可招喪何可望壯志沉淪雄圖埋沒西隴足抵
黃塵碎骨何處池臺誰家風月墳塋霸遠營魂
流寓霸坼無封平陵不樹壯士之隴將軍之墓
何代何年還成武庫

周大將軍幽國公趙廣墓誌銘

公諱廣字乾歸邵惠公之元孫幽孝公之長子
若木拂日長蛇委天龍圖幕河之光神鼎連雲
之氣六辯構字五運徵祥是以維嶽降神自天
生德凝脂點漆日角珠庭爲子則名高五都爲
臣則光照千里華蓋中天之峰未階其峻虞淵
浴日之水不盡其源歲在珥車年方竹馬月內
桂樹切問能訓石上木生懸思卽悟年十一孝
公薨乳乳在疚孺慕過禮泉驚亭水竹動寒林

三行克宣八翼斯舉大周建國宗子維城設贖
封人分司典命開國天水郡公食邑二千戶元
年授使持節驃騎大將軍開府儀同三司其年
四月授都督秦州刺史孝公久牧汧隴遺愛在
人今茲見撫我君之子豈獨司隸之臺鮑宣累
葉丞相之府韋賢重代二年拜大將軍方衛青
之張幕冊重元勲譬韓信之登壇榮高獨拜武
成元年遷都督興梁等十九州諸軍事梁州刺
史嵇冢導漾乃濟漢之東流蔡蒙旅平實華陽

之西極其年九月改封蔡國公食邑萬戶地接
韓城關隣楚鄆戶封八縣恩深寇恂之功邑啓
萬家事極曹叅之賞保定元年授小司寇犴戶
苔生囹圄籥動載酒屬車幸無寃氣慮囚軍府
或聽鳴琴二年轉守蒲城都督潼關等六防諸
軍事其年閏月遷都督秦渭等十二州諸軍事
秦州刺史公亟牧冀城頰藩隴坻豪桀斂手貪
殘解印加以上谷精兵漁陽噪鼓北臨高柳南
望長榆匈奴下馬之山貴相藏酒之谷莫不遠

慕威聲遙承風化一年奉詔向并州迎皇后有
文書手仲子之歸紀裂繻來卿爲君逆自非名
高絕國威被和隣豈得稱族而行尊君之命四
年授柱國大將軍昭陽以功高見用項梁以名
將當官以今方之彼有慙德天和三年授都督
陝虞等八州并防諸軍事陝州刺史屈產垂棘
既有滅虢之兵王官羈馬非無絕秦之路公以
正正鼓旗閑閑車軌服叛威邊笑無遺策但以
中外久勞積斯災疾山川則並走羣望賓客則

諸侯在門是以請謁承明言歸湯沐方詢夏郊
之祀或辯桑林之祟更除秦州刺史仍襲父爵
幽國公分流之嶺未登晚塞之城空望太夫人
以公羸瘠悲泣相守胃氣交衝奄捐館舍公頓
伏苫寢水漿不入雖王人勸奪創鉅愈增母死
於子子死於親慈孝之道一朝惣集大漸之辰
春秋二十有九四關罷市三軍行哭言尋聽訟
猶見寒棠還顧空營惟餘衰柳謚贈某官禮也
六年六月歸塋於秦州之某原玄甲啓路追軫

驃騎之功龍旂贈行深悼東平之遠公亮直惟
忠溫恭惟孝君之仁義飾以禮樂風神機警聰
獻精明有似於宮牆無形於喜愠金版玉策之
記枕籍忘疲蘭葉芝花之圖膏映必舉碣石秋
雲昭陽落月思風含臆言泉流吻翩翩書記則
阮瑀陳琳荏荏風流則王濛謝朓語其百發弓
絕於猿吟論其百中劍深於鴈陣枚乘之望梁
苑不憚棄官樂毅之求燕路無辭千里至如應
變將畧雷電立成帷帳謀猷孫吳闇合有品藻

人倫之志有清平天下之心鵬路忽摧龍津遂
壅嗚呼哀哉太宰早茂三荆長辭萬始撫養遺
孤連枝同氣馬援之誠兄子義存謹飭王况之
事世叔情深愛敬同德比義此之謂乎乃爲銘
曰

御乾從紀乘離作聖白環讓德玄珪受命平一
地紐增輝天鏡傍廕數國前臨七政地屬先登
崑蓬下武玉璜撥亂金騰光輔衛晉承家邢茅
胙土波分建木派流玄扈景命寅序徽猷淵塞

忠有令圖孝爲全德山節蒞政拒珪守國瀚海
時臨燕山行勒平樂高宴金華說經論儒璧水
親禮明庭相風待賦承露湏銘乘舟向日策馬
隨星德舉克明能賢允淑上將授脰元戎推轂
趙失東漁胡亡南牧箭下遼城泥封函谷袞衣
顛露丹檐亟卷約法情推繁辭理遣盜烏懸察
疑蛇立辯人共官園家同野蔣箭雲推景轉風
落似星裂中台山傾左鎮夏楹含爵殷階啓殯
繆幕躡行明旂庭引泰川直望隴水分飛山河

滿目容衛靈歸陵圖石馬車盡衮衣小山搖落
長林變衰淒愴原隰荒涼宅兆樹密人稀山多
路小十里松城千年華表夜臺尤寂窮泉無曉

周驃騎大將軍開府侯莫陳道生墓誌銘

君諱道生字某朔州武川人也本系陰山出自
國族降及于魏在秦作劉父少興武川鎮將山
河抗拒關塞被邊早擅威聲咸多雄烈君讀書
馬上清談劒端獨運六奇專精三畧雖復身居
末將而勇冠旌門位在支軍而謀叅幕府魏正

光五年任統軍隸天柱爾朱榮征北海王永安
二年隨太師賀拔勝入關尋轉別將滑源卷甲
關城東馬並皆克捷君有力焉永熙三年補都
督太祖文皇帝奄有關河令行天下以君幹畧
委之爪牙名洽中涓功叅上佐兵臨河曲前登
白馬之津寇發蒲城先戰黃沙之苑臨晉橫船
旣禽趙將馬陵削樹復下齊兵班瑞司勲披圖
疏爵授驃騎大將軍金紫光祿大夫鄆縣開國
公食邑五百戶趙儼之爲驃騎正駕單車張湛

之拜光祿長乘白馬以斯連類朝野榮之大統
九年更姓侯莫陳氏隨大將軍拓跋遠經始陽
二水長闔三川無市擐甲構病死於轅門春秋
五十一贈持節都督朔州刺史君在武川文皇
帝同鄉里霸功既立王業克成不忘捨講猶論
儼博今嗣德維新功臣追遠東都馬鳴不無見
目之歎北陵車過終憶平生之言有詔更贈使
持節驃騎大將軍開府儀同三司都督宜敷絳
三州諸軍事敷州刺史謚某公禮也夫人拓跋

氏安邑郡夫人庭有鐘鼓家承箴誡教容教德
言告以歸天和五年六月薨卽以其年十月同
塋于京兆某縣洪源鄉武子戍寢請西階而合
塋平陽下嫁卽廬山而共墳銘曰

凝陰遠寂廣漠平寒沙窮瀚海地盡臯蘭塞鴻

秋去胡桑夏乾風土壯氣山河凜然師一作旅

上谷威雄武川君則繼踵代不乏賢匪有忠劔

庭流孝泉魏室多故餘風未殄天保護德當途

廢典上將指蹤中消力展洛城夜捷河梁朝剪

鐵劍金龜榮追玉鉉身胄漢祚門承魏緒並擅
華宗俱稱當路伉儷云匹年齡並故趙瑟秦聲
同爲丘墓小陵石槨洪原鄉墓芻靈兩引池柳
雙前隊路仍合松城卽連霜隨柳白月逐墳圓
芝蘭幾代陵谷何年

周車騎大將軍贈小司空宇文顯和墓誌
銘

公諱顯和字某上黨武鄉人也自大霧浮河長
虹映渚承源於若水纂系於蒼林上黨居衛之

西常山在趙之北因地爲氏可畧而言焉祖求
南衛將軍冀州刺史父金殿鎮遠將軍兗州刺
史並控鶴兵俱張戎樂聲榮之盛繼踵當年公
稟山嶽之靈擅風雲之氣容止矜莊聲名籍甚
變弧挽強左右馳射故得名高上谷威震樓煩
襲爵安吉縣侯食邑五百戶永興三年幽并叛
換有無君之心帝顧謂公曰天下洶洶將若之
何公曰擇善而從之乃誦詩云彼美人兮西方
之人兮帝曰是吾心也乃定入關之策以公母

老家大令預爲計公曰今日之事忠孝不並君
不密則失臣臣不密則失身帝愴然改容曰卿
是我王陵遷朱衣直閣閣內大都督改封長廣
縣公邑一千五百戶武帝初至潼關太祖親迎
潯水太祖素知公名而未之識也目於衆疑而
不問直云令此人射水傍小鳥應手卽着太祖
喜云我知卿名矣卽用爲帳內都督滄州諸軍
事滄州刺史增邑并前二千五百戶黃公衡之
決事魏后是以推心潘承明之忠壯吳王爲之

降禮異代同榮見之今日東夏邊隅地連荒服
井陘塞道飛狐路斷乃以公爲人持節衛將軍
都督東夏州諸軍事東夏州刺史白波青犢之
兵銅馬金縢之亂莫不交臂屈膝牽羊抱馬在
州邁疾解任還朝小馬畱廐餘牀掛壁吏人攀
戀刊石陘山雖非漢陽之城還似扶風之路授
使持節車騎大將軍儀同三司加散騎常侍以
魏後元年疾甚亡于同州春秋五十七天子輟
樂羣公會喪太祖親臨弔祭哀慟左右于昔兵

華交侵晉斷贈謚卽以本官印綬權塋於同州之北山今建德二年二月二十三日遷喪於咸陽長安縣之洪瀆原皆逢禮樂之遷代屬謳歌之變國雖異政人足追榮乃贈使持節驃騎大將軍開府儀同三司小司空丹延綏三州諸軍事延州刺史謚某公禮也夫人高氏渤海人也柔叅晉政拒曹爽之異謀起在漢庭共王陵而俱對况乎箴訓有儀言容以德肅秦中興賢才內則豈直不聽雜樂以變齊國之風不食鮮禽

以斷荆王之獵昔之命塋季武子之兩寢今之
同穴長平侯之北陵世子神舉兄弟至性純孝
善居喪禮有終有始於身無改是以宦成名立
孝顯忠貞銘曰

北岳二名慈河兩本其峻惟極其源惟遠俗稟
山川人資台袞義烈桓桓才雄惻惻乃祖乃父
繼踵威雄攬金北陸鳴玉南宮隱若吳漢賢哉
賈融負霜依德無雷向風挺此含章生茲秉德
孝實天性忠爲人則暢轂鏤膺燕南趙北弱水

將通九部可勒帷幄叅謀官闡典職善擇忠言
能防變色繁弱已勁淇園乃直戟中小支禽穿
左翼建旗赤谷揮戈武州長城萬里河水雙流
潁川多恙淮水未瘳義重穿壁恩深置郵于谷
之口于洞之丘陽山零落碑闕低昂草銜秋火
樹抱春霜書劒俱没人琴並亡哀哀嗣子純心
靡託孝水未枯悲松先落室進巢鷺門通弔鶴
功臣身殞會圖麟閣

庾開府集卷之十六

周新野庾信子山著

明閩漳張燮紹和纂

墓誌銘

周譙國公夫人步陸孤氏墓誌銘

夫人諱某字某本姓陸吳郡人也大夫拓境百
越來庭丞相勒兵三江席卷高祖載爲劉義真
長史留鎮關中旣沒赫連因卽仕魏臨終誠其
子孫曰樂操土風不忘本也言念爾祖無違此

心祖政驃騎大將軍儀同三司恒州刺史父通
柱國大將軍大司馬文安公匡贊經綸參謀揖
讓名高廣武功重長平夫人七德含章四星連
曜敬愛天情言容禮典九日登高作銘秋菊三
元告始或誦春椒年十有四娉於譙國友其琴
瑟愈恭節儉之心伐其條枚實秉憂勤之德鄴
地登高之錦自濯江波平陽採桑之津躬勞蠶
月天和元年冊拜譙國夫人東武亭之妻旣稱
有秩南城侯之婦還聞受封柱國殿下以名華

分照增城峻土揚旌燹道問政邛都白狼之溪
途艱黃牛之坂荔枝之山地險蒲萄之國夫人
別離親戚關河重阻夷歌一曲未足消憂猿鳴
三聲沾衣無已是以天厲之疾遂成沈痼玉瀝
難開金膏實遠建德元年七月九日薨於成都
私第春秋二十有一卽以其年十一月二十二
日歸葬長安之北原詔贈譙國夫人禮也殿下
傷神秋月掩淚長松周季直之畱書更深冥漠
潘安仁之詞藻徒增哀怨豈直西河女子獨見

銀臺東海婦人先逢金闕銘曰

芟陵反旆椒山止戈金精據嶺昌閣淩波西遊
卿相東裂山河華亭冠冕穀水絃歌震維徙族
燕垂從宦塞入飛狐關連鳴鴈策預登阜功參
臨淵寶鼎留銘彫戈餘贊應圖淑令秉禮言歸
魚軒馮軾澤雉文衣明月照鏡仙石支機行雲
細起廻雪輕飛北降帝子南麾蜀守若水旣開
靈山已鏤月峽猿啼江神牛闘星機北轉日轡
西廻陽泉伏氣陰律沉灰鶴辭吳市鳳去秦臺

神光離合燈影徘徊雙流反塋百兩迴旌少女
離位夫人去城帷堂野設帳殿郊營山川奇事
風月無情搖落丘隴荒涼封域樹樹秋聲山山
寒色草短逾平松長轉直節墳方固園陵永植
周趙國公夫人紇豆陵氏墓誌銘

夫人諱含生本姓竇扶風平陵人魏其朝議列
侯則莫能抗禮安豐奉圖功臣則咸推上席外
戚列傳旣聞建武之書仲山古鼎或表單于之
獻祖略少保建昌郡公父熾柱國大將軍太宗

伯鄧國公孟津大誓常預同德之臣咸陽違約
克贊先登之主並得位入六府功參八柄夫人
有文在手有象應圖榮曜夙彰徽華早茂肅恭
以禮受教於公宮言容以德有聞於師氏及乎
進賢君子內主邯鄲琴瑟在堂輜輶是服長久
於節不無秋菊之銘履端於始或有椒花之頌
豈止莊姬掩笑楚相知慙定姜問兆齊兵不入
武成二年冊拜趙國公夫人漢王聞立義之婦
邑以延鄉齊侯見有禮之妻封之石窰異代同

榮差無慙德柱國殿下居若木之一枝在天漢
之別派揚旌玉壘驅傳銅陵南通向日之民東
被無龍之國夫人從政月峽贊德雲門錦濯江
波還臨織室山明石鏡卽對粧樓旣而玉律頻
移金爐不變胡香四兩嗟西域之使稀靈草一
枝恨瓊田之路絕天和五年四月二十二日薨
於成都之錦城春秋二十孫子荆之傷逝怨起
秋風潘安仁之悼亡悲深長簾况復仙臺永別
無復簫聲傳母長歸唯留琴曲七年二月日歸

塋於長安之洪瀆原詔贈趙國夫人禮也雲南
去來旣畱連於楚后光陰離合實惆悵於陳王
銘曰

河西斗絕觀津孤起章武賢臣安豐賢仕木樓
千仞金山萬里紹慶邢姨基昌宋子施衿趙北
侍姆秦南絃綖禮數諭狄駢驂義超江汜仁流
鸞暉玉篋迎鸞金龍助鑾敬愛純深端莊淑問
有光國史無形喜愠舉案外恭停機下訓馨馥
於蘭年華於舜風雨消散神靈離絕婺女還星

姪娥歸月左楹夕奠高堂朝發空揚凌波更無
迴雪下平曰隰高平曰原西臨火井北望塞門
猶垂雉服尚駕魚軒平原忽矣天道何言山廻
地市路沒滕城松悲鶴去草亂螢生新雲別起
舊月孤明賢墳永式節隴常貞

周安昌公夫人鄭氏墓誌銘

夫人諱某滎陽陽武人也周宣王之母弟俾侯
于鄭鄭莊公之重世卿士於周以國爲族自茲
而始祖瓊太常恭侯父穆司空貞公西京賦詩

奉常叅柏梁之宴東都言讖司空爲武衛之官
籍連帝譜旣同盤石門稱通德無廢儒林夫人
禮義閨門端莊令淑采采芣苢萋萋葛覃及乎
作配君子言事舅姑下氣怡聲承巾奉帚親戚
惟禮閨闈以睦保定二年冊拜滎陽郡君序戚
升榮從夫有秋豈惟立義之婦邑以延鄉有禮
之妻封之石窳大將軍沉犀二江夫人聞猿三
峽明月靈關之阻秋風蜀道之難搖以瑤華先
從春露天和十八年五月二十日薨于成都春

秋三十六詔贈安昌國夫人禮也卽以其年十一月十六日歸塋于咸陽之白起原遂使山廻反壤先封節婦之陵日入虞淵實掩賢姬之墓嗚呼哀哉乃爲銘曰

天河開國分畿置政地有十城人居九命疇昔之邑今茲成姓識履傳風叅輿畱慶三星在戶百兩言歸虔恭內政榮曜中闈承姑奉盥訓子停機桑園蠶績綿室鸞飛珩璜節步藻火文衣巴水幽咽猿鳴斷絕月落珠傷春枯桂折趙琴

長辭秦簫永別貞姬掩隧節女封墳洛濱無月
荆臺失雲鳥悲傷聽松聲愴聞千年遂古百代
餘芬

周大將軍隴東郡公侯莫陳君夫人竇氏
墓誌銘

夫人諱某扶風平陵人也章武開國名高外戚
之右安豐入朝位在功臣之上祖以孝昌之始
主諾淮陽父以正光之初褰帷海岱夫人生於
禮義之門宗於箴誡之德虔恭惟禮令淑惟儀

及乎百兩言歸三星在戶箴盟始事條枚是則
有子從政猶無逸豫之心有夫出征自識山陵
之兆大統十六年冊授永安郡君婦以夫尊親
由子貴朝章家慶兼而有之保定二年改授隴
國夫人車服禮數袷襦典則有美河魴足光彤
史旣而風霜所及灰琯遂侵與善何言至于大
漸天和六年四月七日薨春秋六十有六卽以
其年十月十日遷塋於咸陽萬年縣之杜原山
形起伏旣符白鶴之祥地勢風烟乃合青島之

氣銘曰

觀津世族平陵豪姓四侯登仕三君從政白狼
建功卅蛇襲慶漢之廣矣先聞淑令君子朝端
賢才家政簪珥以禮軒車以命讓果成廉推珠
止競百年超忽千金莫恃室謝賢夫庭辭貴子
歸簞輟露采蘋廢祀室委眠蠶衣畱畫雉雲垂
下澤日掩高春空帷舊館虛幕新封山迴廣柳
路沒深松游魂幾變夫人何從

周冠軍公夫人烏石蘭氏墓誌銘

夫人諱某樂陵人也晉司徒樂陵公苞後子孫
就封因卽家焉扶風舊城猶存鐵市河南故墅
尚餘金谷或寓燕陲仍仕代郡祖行代郡尹父
魏司空蘭陵郡公司空佐命魏朝少傳承凝周
室並爲大族俱蒙賜姓秦晉匹也是曰通家夫
人年十七歸于宇文氏淑令端莊含章貞吉箴
盟惟儀閨闈已正某年除金鄉郡君某年改授
冠軍夫人四德小君宜其家室三事內主翻辭
贊務以保定五年四月遘疾薨昔年四十有四

卽以其年某月日歸塋於京兆之某原人世風
煙山川超忽陵波青麥儻逢貞女之墳隴首白
楊或表賢姬之墓乃爲銘曰

三星麗天五岳鎮地禮有其秩人居其位燕趙
多奇山川雄氣挺茲令淑惟此含章玉生庭照
蘭開室香邢姨褻服宋子河魴百兩言歸九儀
從聘綸狄七彩軒車六命鼎室辭親槐廷贊政
世爲閨水人成大夢迴帳山門移燈泉洞金棗
長含銀蠶永送香填栢槲路閉松城悲鸞獨影

雄劍孤鳴留連趙琴悽愴秦笙

周太傅鄭國公夫人鄭氏墓誌銘

夫人諱某滎陽開封縣遠里人也七子賦詩足
光賓客三卿從政實靜諸侯驟乘則晉后停輿
來朝則漢君識履華胄蟬聯無虛史籍祖邠秦
州別駕父茂伯撫軍將軍涼州刺史伯陽縣侯
夫人令淑早聞芝蘭獨茂旣容旣德言告言歸
梯實溫清恭惟箴誨太傅弼諧周室股肱攸寄
夫人輔佐君子勤勞是司琴瑟旣友條枚無伐

故得用之邦國成之孝敬某年月日封鄭國夫人
人綸狄旣加紘綖是務夫有安世之貴躬服浣
濯子有文伯之尊無忘機杼表裏惟安閨闈且
正醫門有疾藥對無徵天和三年三月二十日
薨塋于長安之石安原世子某兄弟並勗慈訓
咸遵母儀霜露深悲寒泉增慟銘曰

居德圃田當官教府置騎賓來開黌學聚福履
家室賢才踵武棠棣之華螽斯之羽人倫七德
風化二南采采芣苢萋萋葛覃節行聲玉副笄

珈簪柳園秉杼桑津浴蠶春秋超忽零落無岨
家亡淑女國喪賢姬香墳永送舞鶴長辭山深
月闇風急松悲千年開閉時驗靈龜

後魏驃騎將軍荊州刺史賀拔夫人元氏

墓誌銘

在河之洲聞君子之配德言采其蕝見夫人之
有禮用之風化人倫厚焉夫人諱安字大羅河
南洛陽人也祖某京兆康王父昭驃騎大將軍
開府儀同三司錄尚書司州牧汝陽郡王附萼

雄圖堦基霸迹公卿之室將相維國維家夫人
能修法度無思犯禮恭儉節用 進賢大統

五年封樂安公主歸于賀拔氏昔年十三思事
憂勤化戍婦德彤管載暉棠棣早茂及乎謳歌
有歸綸狄降等輔佐君子猶安其室周天和元
年乃封章武郡君霜露不居風煙飄忽遘疾累
旬奄捐館舍以周天和四年二月二十六日薨
于長安萬年里春秋五十有二詔贈頓丘國夫
人禮也卽以其年三月二十日歸塋于咸陽之

石安原旣興乘轡翻然永去雖非舞鶴卽掩泉
門欲誌佳城乃爲銘曰

逝矣雄謀悠哉霸轍九服潛運三川中竭卿相
連鑣賢才舞絕琬琰令淑施衿結襦方之棠棣
譬以螽斯旣全婦德還稱母儀逝水滔滔危途
冉冉問藥無對蒸丹不驗狄服空陳絃機虛掩
郭門路轉哀挽途窮隴深結霧松高聚風春蘭
秋菊唯始唯終

周大都督陽林伯長孫夫人羅氏墓誌銘

夫人諱某恒州代郡太平縣人祖某父協周大將軍南陽郡公夫人資於事親躬奉訓誡教于宗室足聞詩禮及乎言歸肅恭如事蘋藻維敬紘紆是勤內位克諧中閨以睦年齡不競霜露先侵更無延壽之杯遂闕長生之枕以周天和四年二月八日薨于長安之洪固鄉昔年二十有三其年某月日塋於萬年縣之壽里山非宋國翻爲節女之陵地異荆臺遂有賢妃之墓銘

曰

畢狼建國靈武開都地接天柱山臨寶符人資
義烈世襲雄圖葛覃維妻棠棣早盛旣安淑德
爰從配命四教弘宣三星克正霜凋桂苑風落
芝田三從闕性五福傷年歸安永絕言告長捐
悽切郊野紆迴隰原風慘雲愁松悲露泣朗月
空嗟傷神何及

周儀同松滋公夫人尉遲氏墓誌銘

夫人諱某河南洛陽人也祖父太師柱國公魏
室喪亂經綸夷阻周朝建國匡翊揖讓圖謀帝

系卽有內外之親分裂山河仍爲舅甥之國夫
人容範端莊儀形淑令六義觀德南風有夫人
之詩八卦成形東方有少女之位姆傳習言公
宮教業箴管線纘佩悅蒞蘭年十有二出適儀
同拓跋競衣其翟服旣得宗婦之儀乘其魚軒
還從列國之禮標梅三實無關其嘗夭桃九華
能修其政某年某月冊拜廻洛縣君母金明公
主魏文帝長女春則帝女採桑秋則王姬築館
夫人出入主家遨遊戚里濯龍園苑長門宮殿

既而膏腴美疢華茂傷年沉痾牀帳蒸離寒暑
三世之術無乏於醫門百草之本徒窮於藥性
建德三年五月七日亡春秋三十昔西河女子
值九節之葛蒲東海婦人得三山之芝草無由
再遇悲矣如何卽以其年十月十五日塋於京
兆之北陵原龜筮告辰丘陵啓奠西臨織女之
廟南望湘妃之墳嗚呼哀哉乃爲銘曰

父曰帝師母曰王姬車服不繫江漢無思是生
令淑觀禮敦詩聲超宋子德茂邢姨繼世盛德

思賢克舉奠雁迎門濡蘋實俎奉盥如事移茵
卽序春冰浴蠶秋機秉杼帝鄉近親帝城近臣
濯龍親戚平陽主人金波廻月玉樹臨春弄玉
鳳皇昌容紫草自此千年無人得道舜華榮曜
飄零何早渭水北原平陵故園纔通谷口卽望
寒門吁嗟此地去矣歸魂孟冬十月長松九年
親賓掩淚悽愴何言

周驃騎大將軍開府儀同三司冠軍伯柴
夫人李氏墓誌銘

夫人諱某隴西狄道人也周有柱史夫子以之
猶龍漢有將軍宛城以之輸馬復有西入上書
仍爲秦國之相東向問計卽是韓王之師父宜
使持節大將軍南北二華州刺史順陽郡公魏
武皇帝之長舅也穰侯魏冉居咸陽之宮曲陽
王根借明光之殿語其貴戚差足擬倫論其退
讓彼多慚德夫人幼而聰敏早聞令淑彤管有
美賢才見稱弄其紙筆懼失諸兄之意剪其韶
齡畏傷王母之心年十有一出適驃騎大將軍

開府儀同三司烈烈以上將領朔中台受任軍國
忠勤規模繁縵夫人輔佐君子言容匡贊增耀
三星欽明四德授巾沃盥有謹於事姑斷織停
機無忘於訓子保定二年冊授大夏縣君旣以
夫尊又云子貴乃遷順陽改郡君夫人之邑或
用鄉名小君之號多從夫秩典冊光臨足稱榮
寵本有風氣之疾頻年增動畧多枕卧飛龜之
散遣疾無徵畫龍之符臨年不驗以今建德四
年三月日薨于館舍春秋四十九卽以其年八

月日塋于長安之洪瀆原神光離合尚在河湄
雲氣徘徊猶歸樓下嗚呼哀哉乃爲銘曰

上書秦州立功漢將隴水分流秦川遙望秋陸
俗勇金行地壯廣武軍中安平河上妻者齊也
調姁曰歸三星夜照百兩朝飛綸翟有典容禮
無違台庭等秩侯服同衣子奉母儀夫聞家政
七族承和九閭連慶紛悅恭肅溫清孝敬杼秉
秋成蠶隨春令年華未落電影先過徒食日氣
空飲天河星凋玉井月捐金波虞淵落日薤露

哀歌寂寞虛奠荒涼象設幽隴龜封重泉蟻結
秋色悽愴松聲斷絕百年何幾歸於此別

附錄

庾信傳

唐令狐德棻

庾信字子山南陽新野人也祖易齊徵士父肩吾梁散騎常侍中書令信幼而俊邁聰敏絕倫博覽羣書尤善春秋左氏傳身長八尺腰帶十圍容止頽然有過人者起家湘東國常侍轉安南府參軍嘗肩吾爲梁太子中庶子掌管記東海徐摛爲左衛率摛子陵及信並爲抄撰學士父子在東宮出入禁闕恩禮莫與比隆旣有盛

才文竝綺豔故世號爲徐庾體焉當昔後進競
相模範每有一文京都莫不傳誦累遷尚書度
支郎中通直正員郎出爲郢州別駕尋兼通直
散騎常侍聘于東魏文章辭令盛爲鄴下所稱
還爲東宮學士領建康令侯景作亂梁簡文帝
命信率宮中文武千餘人營於朱雀航及景至
信以衆先退臺城陷後信奔于江陵梁元帝承
制除御史中丞及卽位轉右衛將軍封武康縣
侯加散騎常侍來聘于我屬大軍南討遂畱長

安江陵平拜使持節撫軍將軍右金紫光祿大夫大都督尋選車騎大將軍儀同三司孝閔帝踐解封臨清縣子邑五百戶除司水下大夫出爲弘農郡守遷驃騎大將軍開府儀同三司司憲中大夫進爵義城縣侯俄拜洛州刺史信多識舊章爲政簡靜吏民安之嘗陳氏與朝廷通好南北流寓之士各許還其舊國陳氏乃請王褒及信等十數人高祖唯放王克殷不害等信及褒並留而不遣尋徵爲司宗中大夫世宗高

祖並雅好文學信特蒙恩禮至於趙滕諸王周
旋款至有若布衣之交羣公碑誌多相請託唯
王褒頗與信相埒自餘文人莫有逮者信雖位
望通顯常有鄉關之思乃作哀江南賦以致其
意大象初以疾去職卒隋文帝深悼之贈本官
加荆淮二州刺史子立嗣

史臣曰兩儀定位日月揚暉天文彰矣八卦以
陳書契有作人文詳矣若乃墳索所紀莫得而
云典謨以降遺風可述是以曲阜多才多藝鑒

二代以正其本闕里性與天道修六經以維其
未故能範圍天地綱紀人倫窮神知化稱首於
千百經邦緯俗藏用於百代至矣哉斯固聖人
之述作也逮乎西周道喪七十義乖淹中稷卨
八儒三墨辯博之論蜂起漆園黍谷名法兵農
宏放之詞霧集雖雅誥與義或未盡善考其所
長蓋賢達之源流也其後逐臣屈平作離騷以
叙志宏才豔發有惻隱之美宋玉南國詞人追
逸轡而亞其迹大儒荀况賦禮智以陳其情含

章鬱起有諷諭之義賈生洛陽才子繼清景而
奮其暉竝陶鑄性靈組織風雅詞賦之作實爲
其冠自是著述滋繁體制匪一孝武之後雅尚
斯文揚葩振藻者如林而二馬王楊爲之傑東
京之朝茲道愈扇咀徵含商者成市而班傅張
蔡爲之雄當塗受命尤好蟲篆金行勃興無替
前烈曹王陳阮負宏衍之思挺棟幹於鄧林潘
陸張左擅侈麗之才飾羽儀於鳳穴斯並高視
當世連衡孔門雖肯運推移賢文屢變譬猶六

代並濩易俗之用無爽九流競述一致之理同
歸歷選前英於茲爲盛旣而中州版蕩戎狄交
侵僭僞相屬士民塗炭故文章黜焉其潛思於
戰爭之間揮翰於鋒鏑之下亦往往而間出矣
若乃魯徽杜廣徐光尹炳之疇知名於二趙宋
諺封奕朱彤梁譙之屬見重於燕秦然皆迫於
倉卒率於戰爭竟奏符檄則粲然可觀體物緣
情則寂寥於世非其才有優劣昔運然也至朔
漠之地葢爾夷俗胡義周之頌國都足稱宏麗

區區河右而學者埒於中原劉延明之銘酒泉
可謂清典子曰十室之邑必有忠信豈徒言哉
洎乎有魏定鼎沙朔南包河淮西吞關隴當昔
之士有許謙崔宏崔浩高允高閭游雅等先後
之間聲實俱茂詞義典正有永嘉之遺烈焉及
太和之辰雖復崇尚文雅方驂竝路多乖往轍
涉海登山罕值良寶其後袁翻才稱澹雅常景
思標沉鬱彬彬焉蓋一皆之俊秀也周氏創業
連屬陵夷纂遺文於旣喪聘奇士如弗及是以

蘇亮蘇綽盧柔唐瑾元偉李昶之徒咸奮鱗翼
自致青紫然綽建言務存質朴遂糠粃魏晉憲
章虞夏雖屬詞有師古之美矯枉非適昔之用
故莫能常行焉旣而革車電邁渚宮雲撤爾其
荆衡杞梓東南竹箭備毳用於廟堂者衆矣唯
王褒庾信奇才秀出牢籠於一代是昔世宗雅
詞雲委滕趙二王雕章間發咸築宮虛館有如
布衣之交由是朝廷之人閭閻之士莫不忘味
於遺韻眩精於末光猶丘陵之仰嵩岱川流之

宗溟渤也然則子山之文發源於宋末盛行於
梁季其體以淫放爲本其詞以輕險爲宗故能
誇目侈於紅紫蕩心逾於鄭衛昔楊子雲有言
詩人之賦麗以則詞人之賦麗以淫若以庾氏
方之斯又詞賦之罪人也原夫文章之作本乎
情性覃思則變化無方形言則條流遂廣雖詩
賦與奏議異軫銘誄與書論殊塗而撮其指要
舉其大抵莫若以氣爲主以文傳意考其殿最
定其區域據六經百氏之英華探屈宋卿雲之

秘與其調也尚遠其旨也在深其理也貴當其
辭也欲巧然後瑩金璧播芝蘭文質因其宜繁
約適其變權衡輕重斟酌古今和而能壯麗而
能典煥乎若五色之成章紛乎猶八音之繁會
夫然則魏文所謂通才足以備體矣士衡所謂
難能足以逮意矣

秋日別庾正員

陳徐陵

征途愁轉旆連騎慘停鑣朔氣凌疎木江風送
上潮青雀離帆遠朱鳶別路遙唯有當秋月夜

夜上河橋

遺事

庾信來聘名譽甚高魏朝聞而重之接對者多

一皆之秀盧元景之徒降階攝職更遞司賓

北史

庾信至北唯愛溫子昇寒山寺碑後還南人問

北方何如信曰唯寒山寺一片石堪共語餘若

驢鳴犬吠耳

世說新語補

蕭韶昔爲幼童庾信愛之有斷袖之歡衣食所資皆信所給遇客韶亦爲信傳酒後爲郢州信

西上江陵途經江夏韶接信甚薄坐青油幕下
引信入宴坐信別榻有自矜色信稍不堪因酒
酣乃徑上韶牀踐蹋肴饌直視韶面謂曰官今
目形容大異昔日昔賓客滿坐韶甚慙耻北史
高祖愛禪令魏澹註庾信集北史

集評

庾信從南朝至北方文士多輕之信出枯樹賦
相示於後無敢言者朝野僉載

山谷言庾子山澗底百重花山根一片雨有以

盡登高臨遠之趣喜晴應詔全篇可爲楷式其
卒章有慶兆民同論年天子萬不獨清新其氣

韻尤更深穩

潘子真詩話

庾信之詩爲梁之冠絕啓唐之先韋史評其詩
曰綺艷杜子美稱之曰清新又曰老成綺艷清
新人皆知之而其老成獨子美能發其妙余嘗
合而衍之曰綺多傷質艷多無骨清易近薄新
易近尖子山之詩綺而有質艷而有骨清而不
薄新而不尖所以爲老成也若元人之詩非不

綺艷非不清新而乏老成
人詩則強作老成而綺艷
清新槩未之有若子山者可謂兼之矣

譚苑
驪駒

庾信之作如玉臺九成瓊樓數仞規模崇麗氣
象清新步虛諸竹並懸絕塵境

皆林
詩評

糾謬

彭城公夫人爾朱氏墓誌銘

夫人爾朱氏河南洛陽人也若夫陰山表裏衝
北斗之璣衡瀚海彌綸直西街之畢昴四背衝

火燭龍開照地之光六月搏風大鵬運垂天之
翼由是奄有京縣遂荒中土車書禮樂三王之
損益可知將相公侯百代之山河不殞祖敞隋
儀同三司金紫光祿大夫岐同金申信臨徐七
州總管兵部尚書金城郡開國公天列尚書之
星地標光祿之塞出身萬里知呂岱之元勲專
命一方識劉弘之重寄父休寂隋左千牛備身
朝散大夫齊王府司馬襲封爵金城公大夫代
諸侯胙土淮仙致雨仍攀桂樹之山楚客臨風

更入芙蓉之水夫人玉臺貞氣金河仙液蔡中
郎之女子早聽色絲譚太傅之閨門先揚內則
彭城公發源殷伯承家漢相山川氣候彰白虎
於華露象緯休徵下蒼龍於曼倩三星照夜竹
梧鳴鴈之期七日秉秋坐薦飛皇之兆夫人年
甫十八遂歸於我巫山南馳逢暮雨於瑤姬華
嶽西臨降明星於玉女動合詩禮言成軌則晨
昏展敬事極於移天蘋藻摯誠義申於申饋女
郎結石響明月而思晨風織婦機牀聽寒蛩血

催絡緯用曹大家之明訓執宋伯姬之貞節加
以心依八覺理會三空遊智刃於檀林泛仙舟
於法海幾神獨照默言象而無施空有兼忘束
筌蹄而不用人生天地壽非金石銀臺竊藥想
奔月而何年玉釜煎香思反魂而無日以某年
月日終于平康里之私第越上元三年十月一
十日合塋于城南之畢原禮也齊侯寢側杜氏
階前對文王之畢原用周公之合塋偃松千古
長無寡鶴之悲文粹百尋還見雙鴛之集爲其

銘曰

合葬非古周公所存苑生千載棺槨雙魂野曠
風急天寒日昏煙霾杳嶂霧失遙村紀黃絹之
碑表對青松之墓門

伯母東平郡夫人李氏墓誌銘

夫人姓李氏隴西狄道人也自涼武昭王以後
一門三公爲四海著族國史家諫詳之矣祖亮
顯後周大將軍滑州刺史流江郡公考玄明皇
朝上儀同濟三州刺史成紀縣男出入三朝

剖符分竹秦隴河濟之地人到于今稱之天下
士大夫知與不知莫不想望其風采夫人生而
純深幼而恭敬長而敦睦成而和惠年及初笄
甫歸于我執箕箒奉舅姑人不間於其娣姒妾
媵之言閨門之內穆如也故宗黨推其令問鄉
閭以爲美談東平公守清白之基逢太平之日
辟命交至聲聞於天詔徵尚書郎遷御史中丞
出爲棣曹恒常四州刺史夫人輔佐君子聿修
內政平旦纒笄則有君臣之嚴沃盥饋食則有

父子之敬報反而行則有兄弟之道受期必誠
則有朋友之信其婦德也如此歷職中外聲名
籍甚和其琴瑟正其邦家者夫人與有力焉蓋
嘗喟然而言曰古者卿之內子爲大帶命婦成
祭服社而獻功可不勗哉可不勗哉由是服澣
濯之衣躬紡績之事筐筥錡釜之器所以執其
勞蘋蘩藟藻之菜所以明其德非夫博文達禮
貞婉聽從者孰能與於此乎及公乞骸告老退
歸初服夫人年踰耳順視聽不衰每獻歲發春

日南長至羣從子弟稱觴上壽者動至數十百
未嘗不勸言善誘借以溫顏侃侃焉闇闇焉有
孟母之風焉有敬姜之誨焉維永淳元年秋八
月旁死魄寢疾彌留終於華陰之望仙里享年
八十有一冬十一月一日景辰遷窆於永豐鄉
之平原從先兆也東平公撫存懷舊用痛悼于
厥心遠近咸集宗親畢會生榮死哀其此之謂
矣是日也皇太子監守長安爛忝爲詹事司直
不獲就展喪次陪奉靈輅敢薦李顥之文庶同

潘岳之誄嗚呼哀哉乃爲銘曰

高岳之上浮雲翔今亟谷之外真氣揚今建功
北狄討西羗今受封南鄭家素昌今於赫祖考
爲龍光今牧州典郡佩銀黃今降生淑質秉禎
祥今茗華菊茂蘭若芳今我有懿德如珪璋今
求之卜筮鳴鳳凰今君子至止玉環鏘今室家
好合琴瑟張今執其麻枲供衣裳今羞其饋食
澄酒漿今諸姑伯姊穆溫良今姨姒叔妹歡未
央兮公之出門牧守四方兮夫人之化德洋洋

今公之告老返維桑兮閨門之內道彌彰兮正
月上日南至長兮子孫歡慶各稱觴兮宋云孟
母魯季姜兮匪怒伊教由舊章兮方期高舉登
紫房兮誰謂冥默掩玄堂兮肅肅松檟鬱成行
兮沉沉厚塋終不暘兮

二作載文苑英華列在庾信諸編之後而不
署姓名世遂誤沿爲庾集余初竊疑之及閱
彭城夫人祖父俱仕隋伯母東平夫人稱祖
仕後周父仕皇朝則又屬周以後人矣然尚

未知出阿誰手也細閱伯母誌後云炯忝爲
太子司直不獲就展乃悟爲初唐楊炯之作
千載蒙昧一朝大明不覺啞然而笑